

【灶頭舊事】徐秀英原作

過年前，吾屋下請油漆師傅來油漆。師傅講，若後尾門分老鼠嚙一隻大空哦！看著嚙壞个紗門，心肝頭一下仔像著著釣樣仔揪纏纏，氣就啟毋出。老鼠係童年个惡夢，原旦想，今這下歇高樓就毋會有老鼠，無想著道高一尺，魔高一丈，這隻老鼠魔，正經毋想分好過年嘍？

還記得該正過忒年个臨暗仔，輪著暖燒水，阿姊帶老弟老妹去禾埕，同伙房裡肚个細人仔，共下搞園人尋同踢銅笕仔，留一儕人在灶下燒樵。掌火个事頭實在當無聊，目珠尾眯著棧櫛項有幾埕晒燥个甜板乾，就拿火鉗同甜板夾等分火焙。金黃色个甜板開始結，略略仔臭火煙个味緒實在錫人食。正焙好个甜板會嬲手，無辦法落嘴，就隨手放在灶頭項畀冷。

灶頭頂還有一碗阿姆下晝个豬油，還溫燒溫燒仔。偷添半碗个舊飯，擺一調羹个豬油同豆油，坐在灶頭下个矮凳仔項，一下仔就划淨淨。伸手去拿該埕甜板，手嘎分重鉤重鉤四隻腳生毛个東西蹬過去。恍著係貓仔，手一拂，盲知跌在吾面前个係一隻像貓仔恁大隻，會嚇死人个老鼠。農家屋有老鼠毋係麼个怪

奇个事情。輒輒倉庫一打開來，老鼠一哪仔舂上舂下。割禾个時節，飯桌頂燥个老鼠肉還異扯飯咧。眼下這恁大隻个老鼠，毋知偷食忒吾屋下幾多袋穀，仰會像貓仔恁大隻。

這隻老鼠，動作還遽哦！尾一瀉就蹶上灶頭，咬等吾个甜板，順等煙涵，跋到天篷。甜板無了無打緊，無幾久這隻老鼠又趕到轉來，趕到煙涵，頭那向下，尾座頂，看著拿火鉗緊搥，厥个嘴擘到大大，當像愛同人拚生死樣仔。嚇佢毋走，高不將就走出去尋大人手。盲知，一起腳愛走，灶下嘎著火了，好得阿哥看著，大家攞水來潑正無燒起來。該暗晡，無飯好食，好得臨暗仔有偷食半碗飯，係無，夜仔恁長愛仰結煞正好？阿爸監在灶君爺前罰跪，無人相信有恁大隻个老鼠，緊跪緊噉，跪到兩隻腳烏青，第二日腳就毋會行，到這下老鼠同个冤仇結大哩。

為著毋分屋下變老鼠竇，煞煞走去五金行買幾埕黏鼠枋，又在枋仔个中央放一細撮个番豆。第三日个朝晨，後尾門正式黏著一隻老鼠，老鼠尾還拂啊拂欸，該對老鼠眼，還係惡豺豺个視等，毋過，這擺贏哩。